

# Rispli sin pupi

Avertura dals 26avels Dis da litteratura en la halla Tircal a Domat

DA MARTIN CABALZAR

■ Questa saira ha lieu en la sala Tircal a Domat l'avertura dals 26avels Dis da litteratura che cuzzan fin dumengia suentermezdi. Sin il vast program da quest figureschan preschenta-ziuns da cudeschs novs, prelecziuns, discurs e divertiment. Ins quinta era quest onn cun in publicum da radund 350 persunas. A la conferenza da medias han Maurus Candrian e Laura Decurtins dal comite d'organisaziun informà ier a Cuira davart l'organisaziun e davart il program.

## Program divertent da venderdi e sonda saira

Dus accents tematics novs ha il comite d'organisaziun da quest onn cun la Prelecziun musicala (venderdi saira) e cun il Rispli sin pupi (sonda saira). L'entschatta dals dis da litteratura dat il scriptur tudestg *Tim Krohn* che prelegia or da ses roman «Zum Paradies», in'emprova musical-ludica «da chapir ils emprims dis da l'umanitad e la rolla dubiosa da Dieu. *Niculin Janett* emprova cun ses intrumentari da jazz da demontar chanzuns rumantschas, cumbinond ellas da nov. Suns melancolics s'enretschan en escapadas solisticas d'extasa, melodias armonicas sa furman en cascadas da tun abstractas, per a la fin chattar l'origin tradiziunal.

La sairada «Rispli sin pupi» da la sonda saira è deditgada a dus texts premiads ed in experiment.

Il quatter artists *Mirko Baselgia* (art liber), *Sara Bienek* (teater), *Pascal Gamboni* (musica) e *Myriam Gurini* (saut) s'han laschads inspirar da dus texts premiads en il passà cun il Premi Term Bel e preschentan lur ovras al public.

## Vernissascha/ preschenta-ziun

Era quest onn èn cumparidas aposta sin ils Dis da litteratura pliras ovras novs. Uschia datti betg main che trais vernissaschas da cudeschs novs. *Benedetto Vigne* preschenta ses nov cudesch da poesias «Diari giapunais». La giuvna poetessa *Gianna Olinda Cadonau* ha en la valischa ses nov cudesch da poesias biling «ultim'ura da not – Letzte Stunde der Nacht». Ella vegn accumpignada da *Mevina Puorger* (moderaziun) ed *Andri Steiner* (musica).

*Leo Tuor* e *Flurin Caviezel* preschentan ensem trais novs discs auditivs cun il titel «Il spért e la val – Der Geist und das Tal», gist cumpari tar la Chasa editura rumantscha. *Annetta Ganzoni* e *Bertina Vital* preschentan l'ediziun bilingua da raquints, essays, satiras e poems en prosa dad *Andri Peer* (1925-1985). *Erwin Ardüser* preschenta la nova monografia da l'artist *Luis Coray*.

*Uorschla Natalia Caprez* e *Blandina Cantieni* preschentan la «Chasa paterna» che fa omagi al *Chardun* (1971-2015). *Silvana Derungs* discuora cun *Arnold Spescha* e cul translatur *Hans Fäh* davart il niev cudisch da poesias «Ei catscha dis – Der Tag bricht an».

La Surselva Romontscha preschenta suenter in'interrupziun da 10 onns finalmain puspe ina giada in tom da la retscha litterara Nies Tschespet che porta la numera 76 e cuntegn poesias da l'anteriuor veterinari e politicher *Alexander Maisen*. Per la moderaziun procura *Alberto Palaia*.

Ensem cn differents giasts preschenta *Karin Kohler* novs cudeschs d'uffants edi da la Chasa editura Rumantscha, tranter auter era il cudesch «Globi discorra rumantsch».

## Discurs litterars e premis

Cun *Arno Camenisch* e era in dals auturs rumantschs cun actualmain il pli grond success preschents als Dis da litteratura. El vegn a preleger intgins texts curts e menar in discurs cun il moderatur *Claudio Spescha*.

En la «Critica litterara» da sonda suentermezdi discurren il professor da litteratura *Clà Riatsch* cun il scriptur *Göri Klainguti* da la relaziun tranter critichers e scenziats da litteratura ed ils auturs. *Martin Camenisch* ed *Esther Krättli* discurren davart ils cudeschs novs e prendan sut la marella ils instruments dals scripturs. Sonda suentermezdi vegnan prelegids e discutads ils texts nominads per la concorrenza litterara. Da las 18 ovras inoltradas tutgan *Gion Dominic Pohle*, *Stina Hendry*, *Romana Ganzoni*, *Ruth Bernardi* e *Alice Bertogg* tar ils victurs potenzials dal Premi Term Bel che vegn surdà la dumengia.



Laura Decurtins (dretg) e Maurus Candrian (san) han preschentà il program dals Dis da litteratura e sa legran da la vernissascha e preschenta-ziun d'in bel dumber d'ovras litteraras novs.

FOTO O. ITEM